

Festival di Buki pa Mucha a habri cu fiesta y hopi alegria

DEPARTAMENTO di Cultura Aruba ta sumamente contento di por a contribui y a forma parti di e grandioso apertura di e Cel-

ebracion di 20 aña di Festival di Buki pa Mucha organisa pa nos Biblioteca Nacional Aruba cu a tuma luga diabierna pasa riba dia 2 di november cu e lema: 'Nos mundo ta draai y ami ta sigui lesa bay.'

Ta custumber pa habri e festival di buki pa mucha cu un fiesta pa mucha y mayornan y esaki a tuma luga dilanti Biblioteca Nacional Aruba, na Playa, riba caya cu'n exito rotundo.

Ta custumber cu Biblioteca Nacional Aruba ta laga e fiesta di apertura parcialmente den man di un scol preparatorio of basico y librerianan local. E biaha aki a toca turno na Maria school pa forma parti di e fiesta di apertura.

Publico a disfruta di un bunita presentacion di Maria School pa e apertura como tambe presentacion di e autornan participante y diferente libreria a pone un coleccion di buki pa mucha na benta bou di tent. Tabata tin cantamento di un grupo di mucha, entre otro nan a canta e cantica di Festival, un produccion di

Sr. Robert Reeberg. Ademá di esaki, riba programa Departamento di Cultura Aruba a sostene e actividad aki cu teatro, baile y un tremendo celebracion multicultural, bou guia di Sr. Fredy Montoya di Seccion di Implementacion cu mas di 40 mucha talentoso di Arco Iris Kleuterschool, Grupo di Baile Kids and Kids y Lenie Jeandor cu e obra "Nos Mundo ta Draai y ami ta sigui lesa bay".

Despues di e excelente apertura di e Siman di Buki 2012 di Biblioteca Nacional Aruba na playa lo tin diferente actividad programa durante siman, como tambe pa e Clausura di e festival aki cu ta den man di Scol preparatorio Arco Iris Kleuterschool

pa celebra e logronan di e di 20 edicion di e festival anual di buki.

Departamento di Cultura Aruba ta invita pueblo di Aruba en general pa bin presencia diabierna awo riba dia 9 di november 2012 na Arco Iris Kleuterschool mes, situa den Avicennastraat # 7, for di 5:30 pm te cu 8:00 pm pa presencia nan "Encuentro Multicultural" na unda tur e 8 kleuterklas lo forma parti di e show di clausura cu'n cantidad di 128 mucha cu lo representa diferente pais, entre otro China, Italia, Portugal, India, Brazil, Africa, Merca (USA) y Aruba. Ademá di e show aki, lo tin un exposicion di diferente charla cu e muchanan a prepara di diferente pais, cuminda tipico di diferente pais, entre otro di Merca, Mexico, India, Hulanda, China, Portugal y naturalmente Aruba. Tambe lo tin tur e autornan presente y un presentacion sorpresa dirigi door di e maestro Jhon Freddy Montoya cu diferente hoben participante di Competencia Hubenil Gang di Arte y otro grupo di teatro y

baile local.

E Juffrouwnan Gabriela Lopez, Charity Croes, Sharma Geerman, Roosje Koolman, Elvia Comenencia, Tasha Rosario, Annemarie Navas, Tahira van Cleef, Niree Hart, Edris Angela y Vanessa Tevreden ta encarga cu e direccion di e diferente show di cada pais cu coordinacion general di Juffrouw Maribelle Arends y asistencia di Sr. Jhon Freddy Montoya como contribucion di Departamento di Cultura Aruba.

Henter pueblo di Aruba ta keda cordialmente invita pa bin presencia e bunita clausura aki, cual lo ta uno hopi educativo y grandi manera semper.

